

յալ գյուղերից և բնակավայրերից գանձվում էին հօգուտ դիվանի (մուխավաջջիհաթ-ե դիվանի)<sup>12</sup>:

Պետք է ասել, որ XVII դարում դիվանի հողերից գանձվող բոլոր հարկերի պարգևումը պետական պաշտոնեությունն ու զինվորականությունը որպես թիուլ իրականում ժամանակավոր, ոչ ժառանգական հողատիրություն զլխավոր ձևն էր, չնայած մեզ հասած վավերագրերում և այլ սկզբնաղբյուրներում մենք դրա իրավական ձևակերպումը չենք տեսնում: Ըստ ֆերմանների թիուլդարներին շնորհվում էր միայն տվյալ օբյեկտի հարկերը գանձելու իրավունքը, ուրիշ իրավունքներ հողի, ջրի և բնակչության նկատմամբ նրանց չէր վերապահվում: Բայց երբ գյուղն իր ամբողջ հարկային պարտավորություններով պատասխանատու էր դառնում միայն այս կամ այն թիուլդարին և այդ վիճակը շարունակվում էր մի քանի տասնյակ տարիներ, իսկ երբեմն էլ թիուլդարի մահվանից հետո փոխանցվում նրա ժառանգներից որևէ մեկին, այդ դեպքում ահա թիուլդարի և նրա հարկատու ռայաթների միջև ստեղծվում էին հողատիրոջ և հողը վարձակալող գյուղացու փոխհարաբերություններ: Շատ հաճախ այդ փոխհարաբերությունները ավելի ամուր էին, քան մուլքադարի և նրա ռայաթների փոխհարաբերությունները, քանի որ այստեղ ևս գոյություն ունեւր անմիջական կախվածություն, որն արտահայտվում էր գյուղական համայնքի կոլեկտիվ պատասխանատվության ձևով:

Համեսալեն նույնպես, եթե այն տրված էր դիվանի գյուղերի բոլոր հարկերը գանձելու իրավունքով, կարող էր համարվել ժամանակավոր, ոչ ժառանգական հողատիրություն: Նման թիուլներն ու համեսալենները ընդհատվում էին տվյալ թիուլդարի կամ համեսալեդարի մահվան, ծառայությունից հրաժարվելու կամ այլ պատճառներով: Այդ դեպքում արդեն գյուղերից ստացվող եկամուտները անմիջապես անցնում էին դիվանի տրամադրության տակ: Բայց դա հազվադեպ էր տեղի ունենում, երբեմն միայն պատահում էր, որ որևէ գյուղից ստացվող ռենտա-հարկը թիուլի ընդհատվելու պատճառով մեկ կամ ավելի տարիներ մնում էր չգանձված: Սակայն դրանք ի վերջո հաշվվում էին և ռոճիկի դիմաց միանվագ տրվում որևէ պաշտոնյայի, կամ իրացվում այլ տնտեսական գործարքներով ու հանձնարարություններով (հավալե): Ինչպես դիվանի, այնպես նաև ոչ դիվանի հողերից գանձվող ռենտա-հարկը եկամտի այն գլխավոր աղբյուրն էր, որով պայմանավորված էր պետության ֆինանսական հենարանի, դիվանական գանձարանի հարստությունը:

Հետզհետե ընդարձակվող դիվանի հողերի անմիջական ղեկավարությունը պահանջում էր հսկայական կազմակերպչական աշխատանք, որ վեր էր սեֆյան պետության ուժերից: Այդ իսկ պատճառով իրեն վերապահելով դիվանի հողերի սեփականության իրավունքը, պետությունը դրանց մի մասը, ինչպես ասվեց, ռոճիկի դիմաց, որպես թիուլ և համեսալե՝ տալիս էր պետական պաշտոնյաներին, իսկ մնացած մասը՝ մասնավոր մարդկանց՝ կապալով: Հիշյալ կապալառուները, որոնք կոչվում էին «մուխաաջիբներ» կամ «զաբիթներ», միանվագ որոշ գումար էին մուծում դիվանական դրամարկը և որոշ ժամանակ մեկ կամ մի քանի հարկային օբյեկտների բոլոր հարկերը կամ

<sup>12</sup> И. П. Петрушевский, Очерки по истории феодальных отношений в Азербайджане и Армении в XVI—начале XIX вв., Ленинград, 1949, стр. 188.